

RIEGELMENT DE STELLINGWARVER SCHRIEVERI'JE PRIES

Artikel 1

De geminteraoden van Oost- en West-Stellingwarf stellen tegere een pries veur et schrieven in et Stellingwarfs in.

Artikel 2

De literaire pries het as naeme: De Stellingwarver Schrieveri'je Pries.

Artikel 3

De pries is bestemd veur wark in et Stellingwarfs en wodt ien keer in de twie jaor uutschreven. In et jaor veurofgaonde an de uutrikkinge van de pries wodt van teveuren een bepaold thema of een bepaolde opdracht deur de warkgroep vaastessteld. De warkgroep zorgt d'r veur dat et thema of de opdracht in datzelde jaor deur publikaosie bekend maekt wodt.

Artikel 4

Et doel van disse pries is:

- a. et anvieten van et verzorgd bruken van et Stellingwarfs
- b. et mitwarken an et utbouwen van de Stellingwarver kultuurtael
- c. et mitwarken an een betere grui en bluui van de Stellingwarver literatuur
- d. van de beleving van Stellingwarver schrieveri'je deur schrievers en lezers uutkommen tot een beter begrip van en inzicht in de literatuur in et algemien

Artikel 5

Onder Stellingwarfs wodt in dit riegelment verstaon: de tael die in Zuudoost-Friesland, Zuudwest-Drenthe en Noordwest-Overiessel van ooldsher leeft en deur taelkundigen as Stellingwarfs anduded wodt. Dat kan inholen dat ok dialekten die wat veer van de standard-schriefftael of lieken te staon, aksepteed wodden kunnen; bi'j twiefel nemt de jury een beslult, zoks, as 't meugelik is, naodat deskundigen raad geven hebben.

Artikel 6

D'r wodt van utgaon dat dielnemers de standard-schrieffwieze bruken (ok wel de Bergveld-spelling nuumd); ere spellings wo'n ok aksepteed, mar dan moet veur dat gebruik wel een reden opgeven wodden die de jury aksepteren kan, en die spelling moet konsekwent wezen, zoks weer neffens et oordiel van de jury. Bi'j twiefel nemt de jury pas (as zoks meugelik is) nao overleg mit ien of meer deskundigen een beslult.

Artikel 7

- a. eerder inzunnen wark wodt uutsleuten.
- b. as et om een vertaelinge gaot, moet et oorspronkelijke wark mit opstuurd wodden;
- c. juryleden meugen zels niet mitdoen.

Artikel 8

De pries die as uutrikt wodt bestaot uut een oorkonde en een geldbedrag van € 500,00.

Artikel 9

De Stellingwarver Schrieveri'je Pries wodt ien keer in de twee jaor uutrikt.

Artikel 10

De pries wodt omstebeurten deur de borgemeister van Oost-Stellingwarf en zien of heur kollega van West-Stellingwarf, of deur een deur heur an te wiesen bekende persoonlikheid uutrikt.

Artikel 11

In de jury wo'n twee deskundigen keuzen deur de gemientebesturen van Oost- en West-Stellingwarf, op veurdrecht van de warkgroep H.J. Bergveld-pries. De dadde deskundige wodt op veurdrecht van de warkgroep H.J. Bergveld-pries keuzen deur de Stichting Stellingwarver Schrieversronte. De dadde deskundige wodt niet allienig op grond van inzicht in literatuur, mar meer nog om zien of heur inzicht in et bruken van verzorgd Stellingwarfs anwezen.

Artikel 12

De jury overlegt een repot an de veurzitters van de beide gemientebesturen.

Artikel 13

De kosten die bi'j et gehiel maekt wodden bin veur de gemientebesturen van Oost- en West-Stellingwarf. De dielnemers hebben gien recht op bepaolde onkostenvergoedings.

Artikel 14

Veur vieftien oktober van et jaor veur de uutrikkinge het de warkgroep de jury bi'j mekeer brocht, neffens disse statuten.

Artikel 15

Inzunnen wark moet uterlik 1 meert van et jaor van de uutrikkinge van de

pries binnen wezen bi'j de siktaoris van de warkgroep.

Artikel 16

Veur 1 juni van et jaor van de priesuutrikkinge heurt de beoordieling klaor te wezen. De daegelikse besturen nemen as regel et veurstel van de jury over.

Artikel 17

In de twiede helte van september wodt de pries in een officiële bijienkomst uutrikt. Daoromhenne en daornao wo'n de belangriekste zaeken van et jaor rond De Stellingwarver Schrieveri'je Pries deur de organisatoren in de publiciteit brocht. In et kot wodt angeven, hoe de jury tot zien besluit kommen is.

Artikel 18

Alle publiciteit, ankondigings, adverteensies en zo wat henne wo'n deur de warkgroep H.J. Bergveld-pries in et Stellingwarfs daon.

Artikel 19

In gevallen daor dit riegelment gien uitsluutsel veur gef, beslissen de organisatoren. In gevallen die et terrein van de jury angaon wodt d'r eerst naar de mening van de leden d'r van vraogd.

Drs. H. Oosterman, borgemeister van Oost-Stellingwarf.

Drs. G. van Klaveren, borgemeister van West-Stellingwarf.

Oosterwoolde/Wolvege, 2008.

TOELICHTING

1. Veur 1 december van elk jaor wodt in de kraanten (en, as dat kan veur de radio en/of t.v.) tiedinge daon deur de organisatoren, dat meensken wark insturen kunnen. D'r wodt veur zorgd, dat in begriepelike tael uutlegd wodt dat et hier gaot om kreatief wark van schrievers op et in artikel 3 bedoelde vlak, en dat meensken die veur disse wedstried wark insturen willen hier niet lezen hoeven, dat heur wark al wat "literaire erkenning" had hebben moet. Mit ere woorden d'r wodt perbeerd, zoveel meugelik drumpels weg te haelen. Dat mag liekewel niet inholen dat d'r niet naor nivo zocht wodden moeten zol. Et doel van de pries wodt daoromme in et kot uutlegd. Veerder wo'n ok de belangriekste zaeken uut et riegelment in de publiciteit brocht, en wodt et adres geven, waar et riegelment en et inschriefformelier besteld wodden kunnen. Et riegelment en et inschriefformelier wo'n op anvrage ommenocht toestuurd.
2. Waor dat neudig liekt, vraogen de organisatoren hulp van et buro van de Stichting Stellingwarver Schrieversronte. Ok kan et bestuur van die stichting raad geven, as de organisatoren dat neudig vienen.
3. De Warkgroep H.J. Bergveld-pries is een kemmissie, die deur de organisatoren insteld is om:
 - a. et riegelment en de procedure te bewaeken;
 - b. een reuster van ofreden op te stellen van de jury;
 - c. een veurdracht te maeken van n'je juryleden, die benuumd wodden deur de in artikel 11 nuumde instellings;
 - d. de uutkringing te organiseren;
 - e. de publiciteit te verzorgen;
 - f. een koncept-begroting op te stellen;
 - g. veerder organisatorisch wark te verzetten.

